



UNIVERSITÄTS-
BIBLIOTHEK
PADERBORN

Universitätsbibliothek Paderborn

Conciliorvm Omnivm Generalivm Et Provincialivm Collectio Regia

Ab anno MCCCCXXXVIII. ad annum MCCCCXL.

Parisiis, 1644

Collatio Tertia. Die XIII. Octobris. Agitur de modo procedendi in
disputationibus, & causa remittitur ad deputatos.

urn:nbn:de:hbz:466:1-15490

⁴ *Prouincialis.*] Græcus scriptor Ioannem nominat, quem de Monte nigro fuisse ait sanctus Antoninus ubi supra.

⁵ *Præcedit.*] Intentio Ephesii erat, quod Romana ecclesia non seruauerit caritatem erga Græcos, sine ipsis symbolo addendo, Filioque. Respondit Colossensis, seruasse caritatem, cuius primum obiectum est Deus; nec destitisse eam seruare erga Græcos, toties eos requirendo & vocando ad rectæ fidei professionem.

COLLATIO TERTIA.

DIE XIII. OCTOBRIS.

Agitur de modo procedendi in disputationibus, & causa remittitur ad deputatos.

AND. **O**RDINE & modo locove supra expositis, Colossensis his verbis exorsus est.

COLOSS. Tuæ sanctitatis benedictione prævia, & cum beneplacito imperatoris & patriarchæ, quæ pridie fuere proposita, breuiter explicabo.

EPHES. Pridie non proposuimus, nisi per modum exordii: non est conueniens nos audire responsum, nisi primo quæ volumus exprimamus.

COLOSS. Petiistis, quare est additum; audiatis rationem.

EPHES. Nil dixi pridie de his quæ dicenda sunt, propter temporis angustiam.

COLOSS. Imo quæsitum perfecte fecistis, & petiistis responsum, morem gerendo, audiatis.

CARD. Placet ut breuiter verba fiant; sed ut pacta seruentur, quibus non seruatis, nil fieri posset. Pridie recessimus cum hoc ut Colossensis responsum daret: eum auditatis, & habebitis & diem integrum ad dicendum quod volueritis. Diffinitiones legere non expedit. Confitemur & symbolum apostolorum, & Nicænum Concilium, & aliorum Conciliorum diffinitiones.

COLOSS. Quia pridie tria tacta sunt, ego ostendam Romanam ecclesiam causam schismati non dedisse.

EPHES. Data est nobis electio arguendi, vel respondendi. Elegimus proponentium partes: quomodo potestis dare responsiones propositionibus, nisi auditis rationibus nostris, quibus dicimus addere non licuisse?

COLOSS. Nonne me interrogasti, si vellem responde-re? signum est, quod amplius nolebatis arguere.

EPHES. Salua reuerentia vestra, non est sic.

COLOSS. Si responsa vultis audire, audiatis.

NICÆN. Nolumus audire, nisi audiantur rationes nostræ: & peto, si licet nobis adducere rationes nostras, vel non; & si vultis nos condemnare tacentes.

COLOSS. Audiatis ad quæsitum per vos, & postea loquimini, vt vultis.

NICÆN. Licet petierimus tunc, vt responderes, non priuauimus nos ab inductionibus nostri quæsiti.

AND. Tunc, hac stante difficultate, unus ex sex deputatis Latinis, Ioannes de Monte nigro prouincialis Lombardiaæ sic inquit.

PROVINC. Multa patres reuerendi proposuistis de caritate, & sanctus Augustinus de ciuitate Dei 10. lib. dicit, caritatem esse, vt quilibet seruet ordinem suum: qui si non seruetur, nec ipsa caritas. Duplex est procedendi modus. Primus per modum argumentationis: & in hoc casu proponens propositiones, & rationes habet adducere. Alius est inquisitionis: & hoc modo quærens non probat. Viam hanc elegistis, & si sic non seruetur hic ordo, non seruantur ergo nec caritas ipsa, cum qua procedendum esse dixistis.

NICÆN. Laudo caritatem seruari, sed modum elegimus arguendi, & sic debemus audiri.

AND. Discussionibus his vigentibus, cardinalis ex deputatorum loco assurgens, ad papæ tribunal accessit; demumve rediens, sic inquit.

CARD. Iubet dominus noster, vt loquar serenissimo principi & reuerendissimo patriarchæ. Putabat dominus noster, Colosensem debere audiri, ex quo ab eo fuit quæsitus, vt responderet: & si permittatur ista varietas, data hac occasione, & in futurum fiet. Vnde cum nos credamus, Colosensem audiendum, vos contrarium, & hora tarda sit; videtur, vt sex deputati hinc inde conueniant cras, & conueniant de modo procedendi, vt hæc demum differentia non succedat.

IMPER. Placet, vt surgamus propter tarditatem horæ: de conueniendis sex, deliberabimus.

AND. Et omnes pariter surrexerunt.